

鑑

止

水

齋

集

鑑止水齋集卷十六

德清許宗彥

辨原釋議雜說論

辨俗

人子之于親也生則致其養歿則盡其哀先王患其
哀之有過不及也乃制爲喪紀之數卒哭而諱生事
畢而鬼事始喪畢而祔一以神道接之夫古之人豈
嘗一日忍忘其親哉然而祭祀皆有一定之節所以
尊嚴其親而不敢褻孝之至也古禮大夫有尸無主
秦漢以下庶人之家皆有主矣至宋而乃有影神儒
者嘗非之然欲後之子孫不逮事祖考者得因歲時

展拜識其儀容此雖非古猶未爲大失也近俗乃多
繪父母小影以丐人之題咏或橫幅張諸壁間或爲
小卷置几案是直以爲玩好之具也嗚呼其亦不仁
甚矣婦人生時出必擁蔽其面今子乃貌之以傳觀
于人可乎人子親歿不忍聞其名古人于官若地之
近嫌者猶避而弗居誠有所不忍也名且不忍復聞
而況忍日對其形于談笑宴私之地乎雖然爲此者
商賈之家陷于不知以是爲尊厚其親焉爾若夫士
大夫而亦爲之則題咏之者必且美其親以及其子
以是爲孝思之不匱也嗚呼豈人子所宜聞乎吾願

孝弟之士深思之

原學

古之所謂學者將以明道而行之也所謂道者內足以善其身心外推之家國天下而無弗達民咸被其其利可文可武可經可權莫有窒于行
者明於造化察於事變洞於人情以閑則止以建則立聖人以是著六經示後世孔子曰誦詩三百授之以政不達使於四方不能專對雖多亦奚以爲又曰興於詩立於禮成於樂然則聖人之教學也期于有用焉耳今之治經者吾惑焉其言曰聖人所以明道者辭也以成

辭者字也由字以通其辭由辭以通其道有必漸然
字有篆隸之異聲有古今之殊考之蒼雅攻其訓詁
其有不通又必博稽載籍展轉引伸以說之一字之
誼紛紜數千言冗不可理而相推以爲古學夫六書
特小學之一耳古之時唯年十五以下者爲之今則
窮老畢精竭慮於此而猶不能盡通將由是以考其
辭復由辭以知其義而期於道之成則雖假以彭聃
之壽而亦有所不能及矣孟子不云乎不以文害辭
不以辭害志今之學者奈何不求聖人之志而專務
其文辭也然而不爲是者則羣斥以爲空疎夫學之

虛實至易明也。積之內見之外，行其所學而賢不肖皆見焉。言其所學而賢不肖皆可知焉。斯之謂實學矣。聯牘殫翰返之心，無當於仁義禮智之數推之家國。天下一無所施之執，人人而告之茫然，不知其所謂。則真所謂迂疎寡效者也。且夫聖人之道，未嘗一日亡於天下。三代以下，凡治平之世，其君若臣之夙夜勤政事，進賢能，退不肖，求乂安百姓，生養得其所，及其衰亂，賢者在下，持名義抑貪僞，扶風教，使弗至大壞者，蓋莫不有六經之意存焉。則皆聖人之學也。漢之世去三代未遠也，有以詩諫者矣，以書行水者

矣以春秋斷訟者矣曾治文字者而能之乎夫六書
亦何嘗非學而以爲高出前世諸儒之上必如是而
後爲學則惑之甚也假令學者僅識今之文字不通
古訓及其聲音獨能得六經之大義而明之其於行
已獨善不害爲原季明先王之道考前古之法度不
害其爲賈董也故夫聲音詁訓之於學譬土壤之於
太山涓流之於河海有之不爲多無之不爲損也經
營於土壤者不知太山之高者也汨沒於細流者不
知河海之大者也坐井觀天而云天專在於是而不亦
陋乎夫敝不極則不返其始也一二專已者倡之羣

焉以爲新奇可喜而慕之繼焉則相與爲名而撫拾以仿倣之蓋數十年于茲矣其亦可以倦而知返乎返之宜何從曰於易研消長之幾於書察治亂之迹于詩辨邪正之介於禮見聖人制事之大經于春秋見聖人制事之大權於樂觀陰陽進退萬物變化自然之理有爲已之力而無求人知之念斯君子之學以致其道者也斯六經之所以切于人萬世而不可廢者也作原學

釋天

善必降之祥不善必降之殃民所以畏天也善不能

金山乃列傳卷一
四
皆祥惡不必皆殃而民終莫敢不畏天者以天之高
且遠而不可測也是故物或有不得其平者天弗問
也祈禱禴禘者於山川于社稷天弗禁也萬物於是
乎敬事鬼神而天益以尊矣

讀明大禮儀

明臣議與獻王禮拘守宋儒之言與聖人禮意未必
盡同顧以萬乘之尊欲崇其親而諸臣斷斷不可亦
足以勵百世之頑懦矣士大夫類多逞臆妄行其母
繼也而不言繼生也而不言生但知隆其所出而於
嫡母之先亡者不復畱位置是父有貴子而不得保

其妻豈非人倫之一變乎尤可鄙者後房姬妾自虞樂也乃反爲所制苟可以尊之者無所不至門生僚吏求我畏我者探微意而迎合之蓋家庭妻妾之辨十不得二三焉是亦人倫之一變也其人豈無懿親密友或相與笑之議之曾不出一言以規正之以爲無益而徒取憎惡焉爾嗚呼昔所不憚爭之天子者今乃不欲行之朋舊也俯仰三百年抑何風氣之遼絕哉

雜說

杭之萬安橋側有列肆焉凡綢錦之以寸計布之以

尺計器物之毀缺不全敗爛不中用者皆集焉有過而詫者曰善學之士其視此也夫今夫先古之書亡失者衆矣凡其無當于理義而又無裨于文章零詞碎句時見于類書小說中吾取而綴輯之或得一紙焉或數紙焉人棄我取猶此肆之所陳也故夫善賈者無往而不得利善學者亦安往而不足爲名哉鳥之羽翮豐滿音聲圓婉者多巢園林主人愛養之彈者弗能及何患宜網其鳴不中律呂文采無可觀美者則棲于山中蔭茂林飲泉水亦能自適其性矣有甲者見之以爲是可取也張羅于山而有獲乙聞

而效之以至丙丁莫不皆然爲甲者復至再至三而不厭今日張羅明日張羅而鳥之羽毛固已盡矣世之人猶謂鳥則甚樂而相與歎張羅者之勞也鳥乎鳥乎何黨之乎

江河所以異于溪澗者源流甚遠所通至廣也嵩太所以異于邱垤者氣象尊峻孕育宏有也以一拳一勾觀之末矣是故爲學者不明乎聖賢述作綱維世宙之大義不達於當世之務徒薈萃散亡用心纖密以爲能是猶蠶之爲繭鼠之飲河可以語小未可以語大也

蜀之山富材木撐覆谿谷自踵至嶺望若簣猛噬伏
匿鳴走依附室于山之下者樵且獵焉以溫飽其身
長其子孫一旦聚而謀曰吾儕終身勤苦恒慮不給
伐山之材可數世富飫其肥蓐其文章其爲利也多
矣吾何爲是戚戚也衆皆曰善於是合羣力操鋸斧
窮晝夜而事之凡竹木之中材者取之無遺其廢穢
叢雜風而燎之殺虎豹麋鹿如邱垤四方謀奇贏者
奔赴踵接山之人坐致金帛無算乃相與新屋舍致
珍膳器玩侈于姬姜更數年資稍匱復走山則蕩蕩
焉爲童山無所獲日以困乃傭食它邑爲窮民嗚呼

庸詎知所以致富者乃以自蹙其生也乎故凡富必有所藏不爲百年之計而取足一日者惑也

禮論上

古之聖人欲天下之久治安也於是乎爲禮禮也者靜天下之人心者也天下之治亂由于人心之動靜靜未有不治動未有不亂民情動久則思靜靜久則思動是故大亂之後易於爲治至治之極易於生亂大亂之後民困兵革思所息肩受命之主出盪滌而撫安之天下翕然以定承平旣久人日衆物力日耗富貴者恃財力以縱其欲貧賤者常不勝歆慕以生

覬倖在上者繩之以政威之以刑民曰此有位與權者所爲也我一日得其位與權則所以繩我威我者我亦可以繩之威之於是政刑不足以靜民而益以速其動古之聖人逆知其必至於是也故於其得天下之始因民之思治而制爲一代之禮以治之自朝廷以至草野吉凶萬事尊卑異等莫不稽之天理合之人情爲之一定之節制而不可越則民無所生其覬覦貴者富者行其禮之所得爲不爲榮貧者賤者亦行其禮之所得爲不爲辱上下相磨厲以禮則無歆慕勢力之心巧者無所逞其詐強者無所用其武

雖有兵凶之變而民猶知顧恤於禮義則不至于動而難靜蓋三代所以久治安其道實在于是周之禮視夏商爲繁密矣而享國之遠亦過之後世如漢之桓靈不必甚于桀紂而天下之禍烈焉唐之昭哀非必甚於幽厲而都社一遷不可復振豈非立國無本異于前代者哉

禮論中

自漢以至元明莫不有一代之禮其異於三代者何哉三代之禮通於上下後世之禮詳于上而不行于下此其所以異也天子制禮者也而禮非專爲天子

設也儀禮十七篇其行于下者十焉使古禮皆在則雖民間至纖悉事當各有可依守是故經禮三百曲禮三千夫人可以習之鄉閭愚賤皆得觀聽而記識焉古者所以能一道德同風俗合天下爲一家豈不由此後世之禮國家有大典儒臣博議依仿古禮而爲之以飾耳目而已至于祭祀婚嫁居室墳墓凡民日用之事固未嘗一一爲之制焉而其編于禮書者自公卿之家猶未能遵本朝之法度而況于庶人乎然則其所爲禮者具文而已上之禮旣不用于下則士民各從其鄉俗之所尙而又各逞私臆以增之益

趨于浮華誕慢而不可止苟非則古昔明道義者莫
知其中失之所在蚩蚩之民日相耀于勢利則不逞
之心生采章服物無所別而祿位輕四民不相異而
賢知紂州黨不讀法社蜡不會民而上下不相親也
其使民囂然而不靖者皆禮之流失爲之也御六馬
者無轡銜以習其馳驟則不可以行將三軍者無營
陳以習其步伐則不可以戰民之於禮猶馬之有馳
驟兵之有步伐也舍禮何以治民故曰國有禮則安
無禮則危

禮論下

或曰禮不行于下久矣今也制之徒不便于俗擾及天下而終不可行耳是不然順人情而制禮斟酌今世之所宜而不必一一求合于古亦何不可行之有夫井田封建之不可復者古今異勢也若吉凶軍賓之事豈有異哉特世愈降則禮愈難必也于繁密之中得通變之道四民異尚不乖其業五方異俗不違其性凡民有所動作一秉于上之節度則民益知尊君而覲上蓋人情所甚不便者莫過于無節無節則貧賤者常若有所不足而富貴者亦終不能以自暢卽如一送終也飾以綵繪盛以鼓吹導從甚且雜以

俳優百戲而又蕩然無等威之辨割其哀慕以從頽俗此豈人情之所樂哉以一推之凡事莫不皆然有聖人作察人情之所便事事而爲之節使上下有所遵守吾見天下之人從之如流水唯恐不及已適鄉野者與之相揖遜鄉人必肅然敬且色然喜吾觀于鄉而知禮行之易也夫天下之亂嘗起于細民彼細民之力固勝于士大夫其爭錙銖較利害或明于士大夫獨其威儀揖讓不能及耳古之爲鄉射禮爲鄉飲酒禮也使細民習觀士大夫之威儀揖讓若是者爲君子反是則爲小人目見而效焉耳聞而慕焉漸

續山房集卷一
一
瀆于其心則不義之事自有所恥而不敢爲而凡邪
說怪行亦不足以惑之故百姓寧而禍亂不作民志
定而無卒然不可知之變君子治國爲百世之計其
必由于禮乎

治論

治天下者任事以官爲官者任事以吏吏雖若微而
治之美惡係焉兩漢功曹掾史皆擇邑之高望尙書
郎以令史久者補之故其時多美政非特官賢抑亦
吏善也六朝時令史猶爲重選降至於明而吏始與
士分途世亦相與賤之夫以賤視其身而欲以賢者

之行責之此必不能之事也且使積日累勞而始得一冗雜之秩爲吏者雖清潔自守亦終莫之貴天下有以操守稱官者矣未聞有以操守稱吏者也無高名之可慕無厚祿之可望則彼所夙夜用心以治事者安得不唯利是圖乎彼歲月足以更事才辨足以濟奸官或朝暮更易而吏累世相傳官深居于府寺吏散處于民間其可以欺詐之勢十倍于官官之強幹者百事或察其二三昏庸之徒乃如木偶寄坐而欲治之善不亦難乎今欲吏之不爲奸則莫若高其品使士人爲之歲滿察其廉能者仕爲郡邑長官其

卑污者卽斥之遷擢之路旣優則吏皆顧恤名節相
尙以廉爭爲皎皎之行士人更爲吏習知政務無迂
懦不曉事之患其于治道必有裨益難者以爲若此
則待吏優于士得無不可夫士之仕于朝者不十餘
年可得監司而吏才長郡邑不爲優也且士或以少
年或由白屋伏讀制義之文一旦出而治民案牘之
不閑利弊之不審簿書一切委之他人誠不若吏之
素習其事者足以收效也夫吏所患者獨無品耳旣
高其品矣雖優之庸何傷吏善其職則政益修雖有
貪暴之官所爲非法吏亦得據禮以爭而官不得以

自恣兩漢之治庶可復觀矣

鑑止水齋集卷十七

德清許宗彥

傳

通政使前副都御史孫公家傳

代

公諱灝字載黃一字虛船又字竹所先世新安人明嘉靖間有贅杭者因家焉公之祖以能治案牘常客遊四方父業儒邑廩生有孝行公少沈敏刻志勉學補諸生成雍正八年庚戌科進士改庶吉士奉

命隨相國史文靖公宣諭三秦還授編修十三年充湖北鄉試正考官乾隆六年擢監察御史時錢價翔貴公言錢少由於盜銷其故在民銅不足請勅雲南

守臣計歲出銅額弛餘銀售民民與官俱足卽盜銷
自息又言督撫劾吏當秉至公不宜寄耳目於近驪
愚覲覲橫生長告許請嗣後參劾欸證明白方許列
疏兩疏皆交九卿議八年六月

上因天暑命刑部釋輕罪挺囚給藥食公請推恩行
之各省次年京察一等明年三月掌京畿道事是歲
蠲免天下錢糧詔以有田之家邀恩蠲賦佃戶亦應
酌減租糧令有司善爲勸諭公言田主佃戶淳濃不
一請爲之定則如納銀一錢者田主旣已免佃民卽
一五分銀數減租穀天下通免錢糧二千四百餘萬

田主佃戶各沾一千四百餘萬之恩得旨交大

學士會同戶部密議擢太常寺少卿洊擢至光祿寺卿十四年先文莊公薦公端謹詳密足勝侍郎之任因得召對其冬授湖南布政使屏苞苴慎黜陟一無所瞻顧在任以失察奸民詐冒職官事罷歸里十六年

高宗純皇帝南巡公迎

駕道左復用少詹事擢至太僕寺卿十八年任河南學政所以教士甚備滿任還都豫士刊石頌德泣送不忍舍是冬命直上書房二十一年擢左副都

御史兵馬司吏目有捐副指揮者當離任都察院請
畱遇缺題補廣成實主之成傅相國兄同官依阿畫
諾公以爲紊選法不可比入奏不列公名公具以聞
上右公罷成副都御史二十三年冬日食降 詔
修省公因上言

聖駕將以明年幸索約邇濟其地在京師直北途經
蒙古諸部與俄羅斯接界僻遠荒寒非

萬乘所宜往請停止以荅天意

上以講武習勞本朝家法蒙古皆子孫臣僕恭誠望
幸孫灝不諳國體以遠涉爲勞開旗人頽廢之習妄

言宜罪猶以言官薄其譴以三品京堂改用方公奏
上時

上召對盛怒詰責殿中皆讐慄公反覆申奏數百言
音制清昶旣出侍衛者皆爭前識公其後因西陲逆
回構亂軍行需馬停遠幸

上諭中尚以公前疏爲言公由是悚感矢力勤慎以
求補過是冬授通政使數與扈從得恭和 聖製

詩三十一年冬卒於官年六十七家素貧困旣數歷
內外疏水自厲不妄取一錢意亦蕭然足也夫人陳
氏能贊君之清節無子以弟沆之子同珍爲嗣同珍

金上之別集卷一
三
幼育於公年十一諸城劉文正公器之賦詩稱美以
州同試用安徽嘗奉檄察饑戶慨然曰民方困委員
往益之擾力辭於上官時論美焉補合肥縣丞嘉慶
十年卒公有側室張氏年十四歸於公公歿時張甚
少矢志自守今尚存年七十餘矣

舊史氏曰公與先文莊公爲進士同年同書侍公教
甚久以公之清峻宜若不可近然遇人愉愉無所選
孝於親愛於兄弟君子人也嗣子克肖限以卑位不
竟其緒又重可惜已

杭太史別傳

宗彥先君子嘗游邗上盧雅雨先生爲嵯使有世舊
延居安定書院杭太史堇浦方主講因從問故後來
往武林多主太史家宗彥趨庭暇日每聞話太史遺
事乾隆辛亥壬子間先君子藩粵東太史子賓仁攜
道古堂詩文集至爲刊之因得悉見太史它所撰著
距今二十餘年矣太史歿後傳狀表墓之文闕如也
比讀道古堂集追憶舊聞次爲太史別傳

太史名世駿字大宗又字堇浦家貧力學假書於人
窮晝夜讀之父母禁止輒篝燈帳中默誦與孫銀臺
灝陳太僕兆崙梁編修啟心相國文莊嚴進士在昌

翰林璫昆仲等爲友五日一相聚互爲主客問難以
多聞見者勝太史尤強記同輩推服雍正癸卯舉孝
廉受聘爲福建同考官

高廟初元 召試博學鴻辭列一等第五授翰林
院編修校勘 武英殿十三經二十四史纂修三禮
義疏國子監嘗有公事羣官皆會方侍郎苞以經學
自負諸人多所諮決侍郎每下已意太史至徵引經
史大義蠶發泉湧侍郎無以對忿然曰有大名公在
此何用僕爲遽登車去太史大笑而罷其盛氣不肯
下人如此歸田後主講粵東粵秀書院刻嶺南集詩

風骨適上最爲當時所稱以比騰笑慎旃兩集其後
主講揚州最久愈負海內重望馳書幣求文之使日
至請益者恒滿坐有先達以經說相質一覽曰某事
見某書某說見某集拾唾何爲乎學子有欲奉教者
太史問其所業以一經對則以經詰之復以一史對
又以史詰之皆窮乃曰某於西晉末十六國事差能
詳耳復詰曰汝知是時有慕容垂乎垂長若干尺得
年幾何其人慙沮太史生康熙三十五年卒於乾隆
三十七年生平勤力著述所撰石經攷異榕城詩話
三國志補注諸史然疑詞科掌錄文選課虛漢書蒙

拾續方言道古堂詩文集已行世鴻詞所業補晉書
傳贊經史質疑史記攷異漢書疏證禮例續禮記集
說兩浙經籍志續經籍攷皆具草槁惟晚年欲補金
史嘗構亭曰補史亭其書未嘗見也太史於詩用功
深嘗曰吾遇杜韓當北面若東坡則兄事之每呼曰
蘇大哥於同時人獨心折厲孝廉鶚然太史體醇氣
健造句雄放孝廉不逮也與丁隱士泓爲親家每論
議古今必推案交詬乃已太史之歸也問諸前輩云
是時亢旱

詔舉直言極諫徐文穆公以太史應
詔太史遂上疏言部臣自尚書至主事皆滿漢

竝列請外省自督撫至州縣亦如此所言紕繆不中理

帝震怒欲置之法文穆悉力營救叩首額盡腫乃得斥歸後迎

駕湖上 賜復原官太史旣無傳狀弗能詳也

高廟巡幸塞外嘗天雨新霽馬上吟迎風葦露清于染過雨山痕澹入詩二句顧謂從臣曰此杭世駿詩惜其沒福耳後有御史祝德麟疑太史不得意或有誹訕訐奏之

九重披覽以竝無違礙聽其流傳

朝廷愛才之盛心大矣遠矣丙辰鴻博諸公才皆出太史下諸公多至顯仕太史獨淪落以終而著撰之富卒亦無逾太史者太史遺書未刻者尚夥賓仁旣歿往往散落人間云

學士梁公家傳

公諱同書字元穎錢唐人嘗得元人貫酸齋書山舟二字顏其齋海內因稱山舟先生晚歲自署不翁九十外又署新吾長翁高祖諱萬鍾曾祖諱國儀祖諸暨縣訓導諱文濂竝以文莊相國貴贈如其官訓導公有三子長翰林院編修諱啟心次贈太傅諡文莊

東閣大學士諱詩正次癸酉科舉人知蠡縣事諱夢
善文莊生二子長卽公次少司空沖泉先生諱敦書
編修公無子嗣公爲後文莊公元配孫夫人繼包繼
徐公與少司空竝包夫人出所後妣許太宜人繼妣
夏太宜人公生雍正元年九月二十八日生而肥白
如瓠長者頗憂其不壽文莊未達時家故貧居鳳凰
山麓包夫人夜織公兄弟方幼戲于旁虎突入戶夫
人驚絕旣蘇視兩兒戲如故問之曰有大獸來四顧
而去亦不知爲虎也鄰里咸異之文莊挈眷入都公
畱侍所後親編修公素嚴少不可意輒箠楚公怡然

順受退無怨容乾隆五年入郡庠十二年丁卯科舉鄉試十七年恩科會試未第

高宗純皇帝特賜與殿試成秦大士榜二甲進士改庶吉士習國書二十一年散館授翰林院編修丙子科順天鄉試丁丑會試兩爲同考官所取必宿齒文率枯窳文莊公見而哂曰汝安從得如許骨董耶二十三年考試翰詹諸臣公列二等擢侍講署日講官起居注是年丁所後父艱公旣澹於榮利又素鯁介恐不諧於俗服闋後引疾不復出二十八年文莊公薨於邸第公徒跣奔喪時少空守遵義亦奉○

○命馳驛至文莊之薨也子姪無侍側者邸中物及平時玩好多亡失或謂當治其事公曰此何時乃念財物耶一無所問三十五年

孝聖憲皇后八旬萬壽公入都祝釐迎

駕次

上顧見曰汝來乎公奏言臣足疾未愈祝

聖母萬壽後卽回籍時陳太僕兆崙與公同列退詫公

上方嚮用君奈何竟自退也五十五年祝

高廟八旬萬壽有力勸公謁時相者以禍福怵公公

不可嘉慶十二年丁卯科浙撫清安泰奏公宜重宴
鹿鳴奉○○命與宴加翰林院侍講學士銜時海內
重與宴者皆止加虛銜惟公獨具官名蓋公耆德清
望聞於

天聽久矣雖不就朝列而型式鄉閭砥柱末俗實有
以助國家培東南之元氣故能默邀

主眷如此公名德日盛大吏至者必首謁公公一報
謝而止終未嘗有所干請人有以事質者告之必委
曲詳盡性雖方正見人溫溫然接之者形神自肅子
姪侍側嘗囁嚅不敢言穀于自奉裘葛未嘗有副一

冠數十年不易出行市人往往環視匿笑於治生頗
纖悉嘗曰吾雖日爲此要於心無所係累耳生平不
受餽遺畢尚書沅自楚致大研公不納使者委之而
去越數年友人有之楚仕者仍附以還畢人有緩急
拯濟無所吝故人子以葬先世爲言公予二十金其
人實未營葬半載後復來言公贈如前在側者曰此
爲迂耳奈何復予公曰葬事甚鉅前所予容不足以
集事其存心之厚如此杭俗好華麗喪車必以影神
樓前導惟公家一依禮制儀從外無浮飾二氏之徒
不入門不爲人慶壽無事不譙客皆足爲居家法顧

士大夫皆心知流俗之非而卒莫有如公所行者愈知公爲不可及也十六年冬公患腦疽危篤中見有人持楹帖入展視其句曰萬里煙雲開嶂戶一天風雨護神鑪病遂愈逾四年至二十年七月十五日卒年九十三卒前數日自書赴筆法蒼勁如平時其年冬十二月十五日葬公於茅家埠之原遵公命也大吏以公品望爲士民所矜式題請崇祀鄉賢祠得旨俞允入祠之日傾城會送前此未有如是之盛者公與少空趨尚不同而友愛甚篤每當別輒再三握手悲不自勝少空數歷中外不名一錢卒後官項數

萬金皆公爲措納朋友世舊初終無異視見其子若
孫猶惓惓不忘撫諸姪無異所生一家之中上下幾
百口事無大小一稟承公六十年無敢違教令者可
謂能齊其家者矣非誠肅所感而能之乎元配汪宜
人同邑水蓮先生諱惟憲次女先生有知人鑒與編
修公拔貢同年公幼從受業遂訂姻焉宜人勤於持
家自少至老未嘗謝息先公三年卒年九十二長公
一歲公性不近內常獨宿齋中與宜人相見整衣冠
如對賓客宜人性寧澹年愈高遇人愈謙下列孫行
者起居亦和顏色立俟之公或畱客共飯倉卒間饌

嘗豐潔蓋宜人夙有所儲以待也編修公每以嗣續
爲念爲公置筵室陳氏亦終其身未御年五十餘先
公卒公於書法出天性十三歲卽能爲擘窠大字求
文莊書者不得暇輒命公代書徐文穆公夫人墓誌
銘卽公少作書法顏柳中年用米法七十後愈臻變
化純任自然名滿天下求書者紙日數束嘗言古善
書皆有代者我獨無蓋不欲以僞欺人我性如是然
託公名者甚衆其去真蹟遠矣日本國有王子好書
以其書介舶商求公評定琉球生自太學歸國踵公
門乞一見公以無相見儀却之其人太息曰來時國

王命必一見公而歸今不可見奈何因丐公書一紙
曰持是以復國王耳公論學書大旨具於與孔谷園
及張芭堂兩書公書刻石者至夥刻工往往不稱公
意惟陳雲村陳如岡馮鳴和二三人最得公筆法本
朝能書人鮮有長於大字者公作字愈大結構愈嚴
九十一歲爲無錫孫氏書家廟額忠孝傳家四字字
方三尺魄力沈厚觀者莫不歎絕少而工詩在翰苑
時與儕輩酬唱風華雋贍其後不多作曰吾不欲求
名不幸以書名爲人所役豈堪更役詩耶重宴鹿鳴
賦七言四篇和者數百人莫能及公於小事皆有常

度久久如一日尤精賞鑒於前人書畫過眼輒別真偽海寧吳生遇名蹟每潢寫其副嘗語人曰他人皆可欺惟山舟先生不可耳觀書至毫不輟精力絕人九十外視聽未嘗少衰臨卒之歲猶能作蠅頭字所著述多散佚不存嗣子玉繩搜輯得十之二三哀爲若干卷玉繩仁和縣增貢生少空長子嗣爲公後篤學力行有介石之操著書多行於世居公喪年逾七十毀瘠有加孫四學昌錢唐學諸生耆乙卯科舉人武義縣教諭衆早卒田順天府經歷宗彥娶公猶女出爲於杭嘗得侍公言論竊謂公行已誠慤似司馬

君實書品風度近王逸少浙人雖婦孺皆知公名所
從扈養無不敬公者與宴日夾道觀者數萬人公不
好名而名愈不可揜如此公之卒也遺命不作行述
嗣子屬宗彥爲家傳因次夙所見聞于公者著之篇
辭雖不文惟其實庶公之後人得因此以見公之梗
概也

丁教授傳

教授諱杰字升衢浙江歸安人自少篤志貧不能得
書就書肆中讀自早至日稷肆主閔其勞爲具食輒
卻之遂肆力經史旁及說文音韻算數咸有所得乾

隆辛卯科莊侍講經煥主浙江試發策問大戴禮敎授所對尤賅貫遂舉鄉薦入都時方開四庫館任事者多延之佐校小學一門往往出其手因與朱學士筠戴編修震盧學士文昭金修撰榜程孝廉瑤田等相講習諸君咸重之在都十年聚書至數千卷手寫者十二三辛丑科成進士當得縣令以親老願改儒官其後十餘年選寧波府敎授嘉慶十二年二月卒年七十子二授經傳經敎授爲學長於校讎與盧學士最相似得一書必審定句讀博稽他本同異用小紙反覆細書孫侍御嘗謂曰君書頗不易讀遇風紙

輒四散不可詮次奈何於大戴禮用功尤深胡處士
渭禹貢錐指號爲絕學教授摘其誤甚多嘗謂緯書
移河爲界在齊呂填闕八流以自廣夫河患之棘由
九河湮廢而害始于齊管仲能臣必不自貽伊戚班
固敘溝洫志云商竭周移秦決南涯自茲距漢北亡
八支則九河之塞當在秦楚之際矣又嘗校雅雨堂
盧氏所刻書傳謂此乃惠徵君裒輯本頗疎舛如鮮
度作刑以詰四方誤讀困學紀聞此謬之甚者五行
傳文不類讀後漢書注始知誤連皇覽然何以合併
爲一亦不可曉最後讀明黃佐六藝流別則此節全

載其中乃知惠氏又因黃而誤也又校鄭氏易注摘其誤引漢書劉向傳鄭氏註者一事誤引乾鑿度者一事乾鑿度注者二事引文選西征賦注不能定爲鄭者一事皆諦當不易讀論語未知焉得仁謂孔傳邢皇兩疏所解竝似經文有闕失證之論衡問孔篇中論智行篇均讀知爲智釋文知鄭音智東晉李充集注云子玉之敗子文之舉舉以敗國不可謂智文子所之無可驟稱其亂不如甯子之能愚蘧生之可卷末可謂智也鄭義雖不傳當同於宏度勝孔遠矣讀管子內言戒篇我游猶軸轉斛南至琅琊云猶卽

由寫者誤重一由字又涉下轉旁遂衍軸字轉斛卽
轉鮒魚與角付與斗均形近而譌孟子轉附寰宇記
引齊都賦晏子春秋竝作轉鮒趙氏旣以轉附朝儗
爲山名而又言朝水名也則仁山金氏謂海旁之山
潮至如舞亦非臆說也又謂字母三十六字不可增
併不可顛倒見端知邦非精照爲孤清不可增濁聲
也疑泥孃明微來日爲孤濁不可增清聲也非卽邦
之輕唇不可併於敷微卽明之輕唇不可併於奉影
爲曉之深喉喻爲匣之深喉曉匣影喻不可顛倒爲
影曉喻匣也教授所著書曰周易鄭氏後定大戴禮

記繹小酉山房文集其爲人校定刊行之書曰毛詩
草木蟲魚鳥獸疏方言漢隸字原復古編困學紀聞
補箋字林攷逸蘇詩補注

論曰宗彥獲交教授時教授齒已高辱引爲忘年之
友竊觀其爲人韶韶然信古自愛惇厚士也讀書強
力鋌而弗舍垂沒前一日猶誦五行大義以支辰配
合之說告其子嗚呼其嗜學弗可及已

汪絳人小傳

君姓汪氏名初字絳人先世徽人遠祖某始徙居杭
遂爲杭人刑部主事名憲者君之祖候選大理寺寺

丞名瑜者君之父君自少儁爽未十歲卽耽吟咏稍
長博習經史十七歲入邑庠君母梁安人山舟學士
女姪也學士精賞鑒君數從譚論學士喜收弄前人
題尺而君獨愛詩箋門攤書肆有所見必購得之裒
成十數巨冊國初諸老輩手蹟皆得之遇佳風日輒
焚香展諷意翛然甚適偶拈筆爲山水小幅清拔似
元人風雅士多樂與君交君亦灑落自恣大理君家
素豐旣而中落鬱鬱不自得徙居吳門君又屢失意
於省試遂慨然入都謀諸友人輸貲爲庫大使試仕
於蜀君少工詞所爲滄江虹月詞少寇王蘭泉先生

見而激賞比入蜀攬山川奇險則詞益進黃天蕩馬
當潯陽驛樓諸懷古作峭蕩蒼涼深得騷雅遺意廉
使方公績愛君才招入幕中文酒娛譙不以屬吏待
也嘉慶十三年六月四川馬邊廳猓夷作亂焚掠村
墅總督發兵勦捕君從廉使往軍務亟冒暑瘧入夷
境贊攻戰之計咸中機要猓夷以平凱旋上將吏功
於朝君名在焉得

旨先以縣丞補用而君積勞成疾遽以某月某日歿
矣君體素羸善病能食酒而飯不過一甌其歿也年
才三十有二子二俱幼君有族叔祖某亦仕於蜀實

經紀君之喪遣送以歸嗚呼君讀書不能掇科第仕
又不得綰印綬以清癯柔脆之軀蕭閒之性出入戎
幕中雖上官知遇而骨肉遠隔羈旅傷懷疲馬孤燈
交游非故其意氣苑塞煩紆必有不可堪者以致天
其天年宜大理君聞之悲慟不能已也

許宗彥曰君余妻甥也辛酉甲子間君與烏程胡駿
卿縉竝從余遊駿卿博洽多聞知君通敏精銳每夜
分飲酒辨論蠡涌余聞而樂之兩人者皆才士也前
年駿卿亡今茲君又卒豈造物者之果忌才耶抑士
之亨其遇成其學者固宜韜養志氣訥然如不出耶

夫芳香易苓犀利必折物亦有然況於人乎

三文學合傳

諸生汪家禧仁和人楊鳳苞嚴元照歸安人儀徵阮侍郎元督學浙江三人竝以高才生受知嘉慶四年侍郎巡撫浙江立詁經精舍招致三人在其中家禧年最幼而沈篤銳敏好學尤甚性謙下常若不及六一泉有神位數百類皆前明湛族破家之遺老莫知其蹤跡家禧一一鉤考得之撰六一泉神位考三篇閱書積千餘種其他所著有意林翼東里學人詩文集鳳苞早以西湖秋柳詞有名於時爲人性僻不樂

至城市於經學小學皆有根柢尤熟諳明末事嘗爲
南疆逸史跋十二篇終身不娶六十外卒元照生而
識字四歲能作大書八齡據案作諸體書求書者盈
戶外江南以爲奇童性倜儻不樂市井所著有悔庵
文鈔詩鈔詞鈔娛親雅言爾雅匡名等書皆可傳嘉
慶二十二年家禧自閩中歸得疾而歿無子其次年
元照亦歿三人者皆方聞強記有守君子人也高陽
許宗彥爲之傳系以讚曰

家禧純脩鳳苞國士奇童磽磽獨行自喜棄妻離子
毀家而徙水火之英江漢之靈匪今斯今貽我學馨

陳節婦傳

陳節婦德清東鄉渭溪里人許嫁同邑國學生王某爲繼室將婚而某卒節婦欲往奔喪父母止之曰命不偶王氏當別擇良與家母自苦節婦曰不然嫁而寡命也未嫁而寡亦命也命若是安所逃諸未嫁而寡而可以他適者嫁而寡而不他適直計無復之耳且彼有穉子在微女往孰爲撫之父母弗能奪也遂衰絰以如王氏夫禮不言室女守節君子不以難能責人非謂其不當守也昔衛宣夫人歸于衛至城門而衛君死保母欲還女不可遂入持三年之喪君子

美其貞壹列之衛風之首若節婦非其倫歟既至王氏撫其子成長遇小過譙何不少恕子益成立能善事後母有孫四人使朝夕侍側娛母心以故節婦晚歲甚懽功令守節至三十載旌其門節婦之歲過之嘉慶某年月日有司爲請于 朝旌表如例予姊輩沈忠瀾與王某友爲予言節婦事因次其語俾後之修志乘者有考焉

— 章母王孺人傳

孺人姓王氏浙江歸安人父聚奎世爲士族孺人少端重寡言笑動止合禮節年二十五適同縣章希曾

逾年生一女而章驟病以歿父母在堂孺人深自抑痛奉養如章在時姑患瘵晝夜侍湯藥衣不解帶以孝聞其後希曾季弟子芹生父命爲希曾後孺人乃有子所以恩勤之甚備尤嚴課讀使力學爲成人今浙江巡撫儀徵阮雲臺先生爲學使時高孺人之行大書折蓼恤緯四字顏其堂嘉慶六年孺人守節逾三十年大吏具狀入奏章下禮部如舊例旌門加棹楔焉宗族榮其事者咸登堂奉觴爲孺人壽孺人喟然太息曰身不幸遭命奇薄所以勉強隱忍視息人世徒欲爲夫延一綫祚耳今芹生已成長歲時使

持一盂飯上夫墓他日相見地下庶用是無愧色其
他豈身所欲哉嗟夫此數十年中含辛茹苦無可告
語之心雖以有志丈夫處之或不免怨天尤人煩冤
勃鬱而孺人坦焉行所無事是非安于義命固然而
能之耶 國家褒揚之典以爲薄俗勸要之貞婦之
本懷固有不願及此者聞孺人之言可以知其志矣
孺人女適吾邑戴晉璉晉璉父恪然與宗彥善數數
爲言孺人事且屬爲傳宗彥非世之能文者又烏足
以傳孺人姑序次之爲作傳張本其或可也

詹烈婦傳

詹烈婦璩氏女父國學生銓仁烈婦爲女時婉然柔
淑習女誠敬慎父母愛之歸詹生某生於兄弟行季
也諸姒在前烈婦事姑孝長稚之禮無所失生體弱
而好讀書力學致病病亟烈婦籲神求代生卒死婦
言語如平常姑知其將以身殉也命家人守之越四
十六日守稍懈飲藥死矣年二十五名德悌浙江常
山人嘉慶十年事

論曰孟子曰可以死可以無死死傷勇烈婦之死不
傷于勇歟孔子曰志士仁人有殺身以成仁無求生
以害仁仁者生之理也烈婦守不二之節懷從死之

志假令勉強就活雖其食息與人無異其心塊然漠然生理早盡是謂形存而心死奮然一決追夫於地下毅魄所感召其夫之精氣亦必隨而復聚是身死而心生也然則烈婦之死其仁也乃所以爲勇也

族姪婦戴宜人傳略

己巳孟秋十日宗彥過謁憲部兄兄出見淚痕在面驚問故則曰大兒書至其婦戴中暑暈遽歿婦賢而能和而有禮遇余夫婦孝謹甚至兒爲州縣得盡心官事不以家爲慮婦有力焉余旣悼失賢婦又念兒之失其助也夏初婦侍余至兒署余將返婦送余涕

泗不能自制余雖心憐其孝亦頗訝其過悲詎意凶
兆見於此乎宗彥素知宜人賢孝聞兄言益相與詫
惋越旬日遜懷與宗彥書述宜人生平乞爲文以紀
乃敘次之備許氏家乘焉宜人姓戴氏仁和人考戴
陳詩太學生母童孺人年二十一歸於許爲刑部員
外郎學范豕婦候補江蘇直隸州知州乃來元配自
其少時嫻典誡女紅中饋事精習之文史詞翰粗通
曉刺史母其姑也每歸寧見諸女姪尤重宜人乃爲
長子娶之旣歸事祖舅姑舅姑能順志意盡敬養刺
史家自上世閨門邕睦家法爲鄉黨所稱馬太恭人

在時五世同堂祖姑舅姑以下小叔五人小姑娣姒子姪孫行男女數十人宜人咸得其歡內外無間言此雖庸行亦婦人所難能矣刺史以名孝廉選縣令仕粵東西歷香山桂林皆繁劇政訟叢雜宜人措置家事秩秩然遇不足斥簪珥以共願夫爲廉吏無他憂身不願華飾也迎養戴恭人膳羞必親饋事大小必咨命以行童孺人先就宜人養相依如在室以至於卒不弛其孝嘉慶十三年刺史以最擢直隸州謁疾旋里宜人歸侍舅姑喜見顏色其秋舅有疾宜人晝夜侍恒率先諸娣姒屏氣候問疾愈始卽安宜人

年壽未高子孫蕃衍見聞者無不健羨亦其孝德足以致之焉姊妹三人皆早寡宜人嘗自願先夫子死十四年刺史分發江南攝太湖同知事奉檄至會城讞獄宜人忽患頭痛醫以爲中暑不可治亟歸視則已不能出言淚熒熒然承睫而已越宿遂卒宜人伉儷甚篤三十年相敬如一日刺史雖近遊亦有離別色故刺史永逝之悲幾不自勝舅姑之悼其婦言發淚俱殆非尋常所有自親戚至婢媼無不噫痛者宜人之賢於是益信宜人生乾隆二十四年九月二十三日卒嘉慶十四年七月初七日年五十一以夫任

勅封孺人晉宜人子三敬身候選知縣省身候補鹽
大使昌身早夭女六皆殤孫二元之拭之孫女二